

IRUCHULO. ¹



(ON KARMELO ECHEGARAY JAUNA-RI)

Zoraturikan arkitutzen naiz
Iruchulori begira,
Ikusirikan urte guchiyan
Onek eginduben jira;
Gisa oñetan ez naiz bakarrik,
Asko arritutzen dira,
Urte batzuben azaldugabe
Kanpuan izan badira.

Berrogei urte izango dira
Irtzen nintzala emendik,
Bañan nik ez det arkitu iñon
Au beziñ uri politik;
Euskal-erriaz oroitutzian
Negar egiten nuben nik,
Bañan biyotzak esaten ziran:
Biur zindezke oraindik.

(1) Composicion premiada con *accèsit* en los Juegos florales celebrados en esta Ciudad en 1890.

Jaungoikoari eskatzen niyon
Osasuna emateko,
Euskal-errira irichi arte,
Nere seaska ikusteko;
Eta onduan Ama Euskarai
Alegiña laguntzeko,
Betikotasun ordu artean
Ez nitubela utziko.

Osasun ona eman ziraden
Nere jaungoiko maitiak,
Andikan laster ekarri nindun
Iruchulora ontziak;
Azkar pozakin bete ziraden
Malkoz nere bi begiak,
Esanaz, au da lasaitasuna
Artu dun biyotz neriak.

¡O! uri gure maitagarriya,
Gallenki zera azaltzen,
Zuri ematen dizuten fama
Danak dute ezagutzen;
Mundu guztiyan zuregatikan
Asko dute itz-egiten,
Zu aña eder ta garbiyagorik
Besterik ez dala arkitzen.

Ugarte baten gisa zerade
Arkitzen uran erdian,
Badirurizu klabelin sorta
Lore ontziyan gañian;
Koncha ederra zurekin dezu
Besterik ezdan añian,
Erru char asko kentzen dituna
Beartzen geradenian.

Eleiz dorreko ezkil soñuba
Aditutzen det oranchen,

Itsas-aideak nere aldera
Oyartzuna du ekartzen;
Baga aundiyak jorru! egiñaz
Ikusten ditut etortzen;
Ondartzan gero lerturik dira
Murmur utsera biurtzen.

Mendi ederrak ere dauzkatzu
Gorde lekutzat urrian,
Jauregi chiki politak dira
Ikusten arbol tartian:
Edertanunan ispillu zera
Mundu guztiyan aurrian,
Beti orrela azal zaitia
Loratsu larros gañian.

FELIPE KASAL OTEGI.

